

DATE: 30/3/2010

PM bentang laporan MEB hari ini

BH-30/03/2010

Cadangan dihasil MPEN jadi Malaysia lebih berdaya saing

Oleh Kamarulzaidi Kamis
kamarulzaidi@bharian.com.my

KUALA LUMPUR: Perdana Menteri, Datuk Seri Najib Razak, hari ini membentangkan laporan Model Ekonomi Baru (MEB) ke arah menjadikan Malaysia negara maju dan berpendapatan tinggi menjelang 2020 dan bakal menjadi wadah pentadbiran serta pengukur pencapaian kerajaan.

Laporan yang dibentangkan pada persidangan InvestMalaysia, di sini adalah cadangan yang dihasilkan Majlis Penasihat Ekonomi Negara (MPEN) berdasarkan keperluan ekonomi semasa negara dalam usaha menjadikan Malaysia lebih berdaya saing.

Cadangan itu juga selaras dengan beberapa agenda besar lain yang sudah dimulakan seperti niat dasar 1Malaysia, Bidang Keberhasilan

Utama (NKRA) atau Indeks Petunjuk Prestasi (KPI) dan Pelan Halatuju Transformasi Kerajaan (GTP) yang dilaksanakan ketika ini.

Semalam, Pengerusi MPEN, Tan Sri Amirsham A Aziz, menyerahkan laporan cadangan berkenaan kepada Najib yang juga Menteri Kewangan.

Laporan 151 halaman itu antara lain mengenal pasti arah dan bidang baru untuk membebaskan Malaysia daripada perangkap negara berpendapatan sederhana.

Antara lain, pembentangan bagi membolehkan pemegang kepentingan termasuk rakyat, peniaga dan pertubuhan membincangkan serta memberi maklum balas sebelum ia dimuktamadkan dan diumumkan bersama Rancangan Malaysia Kesepuluh (RMK-10) pada Jun ini.

Laporan akan diberi kepada orang awam bermula hari



NAJIB menerima laporan cadangan MEB daripada Amirsham di Kuala Lumpur, semalam.

ini, sekali gus mencerminkan dasar kerajaan yang telus dan inklusif dengan mengambil kira kehendak rakyat sebelum membuat keputusan.

Pada minggu lalu, Najib berkata, beliau akan turut mengumumkan beberapa reformasi pentadbiran dalam laporan MEB yang dilaksanakan untuk menyokong pelaksanaan model itu supaya ia mencapai matlamatnya.

Penganalisis Ekonomi Maybank Investment Bank Bhd, Suhaimi Illias, berkata sasaran MEB secara umumnya adalah untuk menjadikan Malaysia sebagai negara berpendapatan tinggi menjelang 2020.

Bagi tujuan itu, katanya, kerajaan dijangka mensasarkan meraih pertumbuhan Keluaran Dalam Negara Kasar (KDNK) antara lima hingga lapan peratus setahun bagi tempoh 10 tahun akan datang.

"Selain itu, kerajaan dijangka menyasar menaikkan pendapatan perkapita rakyat kepada antara RM50,000 hingga RM57,000 berbanding

FAKTA NOMBOR

RM57,000

sasaran

Pendapatan perkapita rakyat

RM24,000 sekarang," katanya dalam nota penyelidikan bank pelaburan itu.

Suhaimi berkata, MEB juga dijangka menggariskan lapan pelan tindakan atau strategi untuk mencapai status negara maju.

Antara strategi termasuk langkah merangsang modal insan bagi meningkatkan kemunculan usahawan, pencipta dan pereka di kalangan rakyat.

Strategi lain yang dijangka dibentangkan adalah meningkat pelaburan domestik dan asing; rancangan penguangan subsidi secara berperingkat; mengehadkan pengambilan pekerja asing dan inisiatif hijau atau mesra alam.